

四明叢書

張宗祥



不如多與之邑唯器與名不可以假人註曰繁纓者
諸侯之制以朝于君者也○魯論子華使於齊冉子
爲其母請粟子曰與之釜請益曰與之庾冉子與之
粟五秉子曰赤之適齊也乘肥馬衣輕裘吾聞之也
君子周急不繼富註云子華姓公西名赤字子華冉
子名求皆孔子弟子也言公西赤嘗爲孔子使於齊
國去了冉求爲赤母請粟於孔子孔子言與之六斗
四升之一釜冉求再請加益之孔子言與十六斗之
一庾而冉子乃私與之十六斛之秉者五而孔子乃

賁冉子曰公西赤往齊國乘肥壯之馬服輕美之皮
裘復言我聞君子之濟人但補不足而不續有餘也
乞之忍第六十二

簞食豆羹不得則死乞人不屑惡其蹴爾

惡去聲蹴
七宿切

孟子曰一簞食一豆羹得之則生不得則死蹴爾與
之乞人不屑也簞竹器也食飯也豆木器也羹湯也
蹴踏也不屑謂爲不潔也乞人丐乞之人言斯人尤
飢渴之甚者欲得飲食之最急而猶惡其不潔寧死
而不食也

晚菰早韭赤米白鹽取足而已安貧養恬

南宋周顒字彥倫顒七世孫也仕宋爲國子博士嘗
於鍾山西立隱舍沐浴則歸之清貧寡慾終日長蔬
王儉謂顒曰卿山中何所有答曰赤米白鹽綠葵紫
蓼又文惠太子問顒菜食何味最勝顒曰春初早韭
秋末晚菰於斯自足不慕於人如此見周顒傳○東
漢馬少遊曰士生一世但取衣食纔足至求贏自苦
爾○陶潛詩云安貧守賤者自古有黔婁○莊子繕
性篇古之治道者以恬養知無以知爲謂之養恬註

曰知周萬物而淡然自若者謂之養恬

巧於鑽刺郭尖李錐有道之士恥而不爲

北魏郭景尙字思和太原人涉歷書傳曉星曆占候
言事頗驗初爲彭城王中軍府參軍遷員外郎善事
權寵世號郭尖將位中書侍郎未拜而卒見郭祚傳
○北魏李崇子世哲性輕率供奉豪侈少經征役頗
有將材爲三關別將討羣蠻大破之孝武時爲後將
軍拜鴻臚卿又遷相州刺史性傾巧善事人亦以貨
賂自達時高達劉騰之處勢也皆與親善故世號爲

李錐見李崇傳○有道之士恥而不爲者卽傳所云
志於道德者功名不足以累其心者也若郭李所爲
之事實恥之而不爲也

古之君子有平生不肯道一乞字者後之君子詐貧匿
富以乞爲利者矣故陸魯望之歌曰人閒所謂好男子
我見婦人留鬚眉奴顏婢膝眞乞丐反以正直爲狂癡
噫可不忍歎

陸魯望唐人隱三吳自號江湖散人乃著歌曰江湖
散人歌有曰人閒所謂好男子我見婦女留鬚眉奴

顏婢膝眞乞丐反以正直爲狂癡謂世俗所謂此美好男子我見其與婦女何異特留其鬚眉得名爲男子而善其柔順俯仰之奴顏逞其側媚逢迎之婢膝眞類乞丐之態度卻反指正直之人爲狂妄癡愚其刺世俗之澆薄如此

求之忍第六十三

人有不足於我乎求以有濟無其心休休馮驩彈鋏三求三得苟非長者怒盈於色維昔孟嘗傾心愛客比飯弗憎焚券弗責欲效馮驩之過求世無孟嘗則羞欲效

孟嘗之不吝世無馮驩則倦羞彼倦此爲義不盡

驩呼官切

詩黍離云不知我者謂我何求○大槩人凡有不足之事當以義理制之可以取可以無取以其有者當濟其無者於我心則休休然無欲自得有何過求而取辱焉○戰國策齊孟嘗君姓田名文父曰靖郭君子田嬰齊宣王庶弟也招致賓客常數千人貴賤一與文等曾待客夜有一人蔽火光客怒以飯不等輟食辭去文起自持其飯比之客慚自到時有馮驩貧乏不能自存聞孟嘗君好客見之置傳舍居有頃乃

彈鋏而歌曰長鋏歸來乎食無魚文遷之幸舍食有

魚矣又歌曰長鋏歸來乎出無輿遷之代舍

更代侍奉出

入乘車矣又歌曰長鋏歸來乎無以爲家左右皆惡
之以爲貪而不知足孟嘗君問馮公有親乎對曰有
老母孟嘗使人給其食用無使乏於是馮驩不復歌
孟嘗君問門下客誰能爲文收責於薛馮驩署曰能
孟嘗君請而見之謝曰文倦於是憤於憂開罪於先
生先生不差乃有意欲爲收責乎驩曰願之於是臨
行曰督責畢何市而反孟嘗曰視吾家寡有者驩至

薛見其貧不能與者悉取券焚之長驅到齊晨求見
孟嘗怪其疾衣冠而見之曰來何疾也何市而反對
曰君宮中積金寶狗馬實外廩美人充下陳所寡者
唯義耳與君市義而彰君之善聲也孟嘗乃拊手而
謝之後期年孟嘗就國於薛未至百里民扶老攜幼
迎於道中孟嘗謂驪曰先生爲文市義乃今見矣
償債安得惠開給喪誰是元振噫可不忍歟

南梁蕭惠開少有風氣涉獵經史拜益州刺史將還
府錄事參軍劉希微負蜀人債將百萬爲債主所制

未得俱還惠開與希微共事不厚而殿中凡有馬六十匹悉以乞希微償債其趣不常如此見蕭思話傳
○唐郭元振魏州人少有大志十六歲與薛稷等同爲太學生家嘗送資錢四十萬會有喪服者扣門自言五世未葬願假以給喪元振盡與之無少吝不質名氏稷等歎駭後仕武后睿宗玄宗三朝位至平章封代國公見本傳

失之忍第六十四

自古達人何心得失子文三已下惠三黜二子泰然曾

無愠色

魯論記子張曰令尹子文三仕爲令尹無喜色三已之無愠色註云愠含怒意也子文姓鬬名穀於菟字子文楚之上卿令尹也其人三登仕爲令尹之官而喜不形於外三罷其職而怒亦不形於外蓋其心休休焉而得失何關與焉○下惠柳下惠姓展名禽魯大夫嘗爲魯國士師之官三見黜於君而不去故魯論曰柳下惠爲士師三黜人曰子未可以去乎曰直道而事人焉往而不三黜枉道而事人何必去父母

之邦孟子曰柳下惠遺佚而不怨阨窮而不憫詳註
云柳下惠時不用而遺佚則不怨身不達而阨窮則
不憫憫憂憫也子文又見喜忍下惠又見直忍

銀杯羽化米斛雀耗二子淡然付之一笑

唐柳公權文宗朝充翰林學士而主藏奴盜用嘗貯
銀杯盃一箇緘識如故而器皆亡而奴妄言叵測權
笑曰銀杯羽化矣不復詰覓本傳○南梁張率字士
簡十二能屬文天監中爲司徒性嗜酒不事於家務
尤忘懷在新安遣家童載米三千石還宅及至宅耗

其太半問其故答曰鼠雀耗率笑曰壯哉鼠雀竟不
研問見張裕傳

蓋有得有失者物之常理患得患失者目之爲鄙塞翁
失馬禍兮福倚得喪榮辱奚足介意噫可不忍歟

聲

徽庵程氏釋一治一亂曰氣化在天者有盛有衰事
理在人者有得有失○魯論孔子曰鄙夫可與事君
也與哉其未得之也患得之既得之患失之苟患失
之無所不至矣註云鄙者庸劣之謂得者得其富貴

權利謂此鄙夫未得富貴權利之時則惟患不得之
既已得權利富貴之時則又惟患其或失之也○淮
南子曰塞上之人有善馬者號塞翁也其馬亡入胡
人皆弔之翁曰此何詎不爲福居數月其馬將胡駿
馬而歸人皆賀之翁曰此何詎不爲禍時家富馬良
其子好騎墜而折髀人皆弔之翁曰此何詎不爲福
居一年胡人大入丁壯戰死者十九此子獨以跛足
故父子得相保故福之爲禍禍之爲福變化不可測
死者十分中死九分○老子曰禍兮福之所倚福

兮禍之所伏

利害之忍第六十五

利者人之所同嗜害者人之所同畏利爲害影豈不知
避貪小利而忘大害猶痼疾之難治鴆酒盈器好酒者
飲之而立死知飲酒之快意而不知毒入腸胃遺金有
主愛金者攫之而被繫知攫金之苟得而不知受辱於
獄吏

攫居
縛切

荀子榮辱篇云好利惡害君子小人之所同也若其
所以求之道則異○淮南子曰愚者惑於小利而忘

大害○瘡疾久固之病也故曰難治喻夫貪利忘害之人心亦猶是也○劉子利害篇云利害者得失之本得失者成敗之源就利而避害愛得而憎失物之常情眩於利而忘於害黃口以貪餌而忘命異鵠以見利而忘身是以智者見利而思難闇者見利而忘患思難而難不至忘患而患反生又曰鳩酒盈卮渴者弗飲非不渴也飲而立死故漢書霍誦傳誦奏記於梁商有曰觸冒死禍以解微細譬如療飢於附子止渴於鳩毒未入腸胃已斷咽喉○列子說符篇云